

Quero ser da túa familia, Xesús.

Grazas Xesús porque nos amas e nos perdoas.

Ti queres que tamén hoxe nós sexamos dos teus, os teus discípulos, a túa familia.

Grazas por regalarnos a túa Palabra que nos ilumina

para vivir unidos a todos e vencer o mal que imos atopando.

Queres que formen parte da túa familia

os que fan a vontade do Pai, escoitando a súa Palabra e cumpríndoa cada día.

Grazas, Señor, pola familia da Igrexa

que hoxe te fai presente na Eucaristía, regálanos o pan que nos fai fortes na fe e perdóanos a través do sacerdote na Penitencia.

Aquí estou, Señor, para escoitar a túa Palabra,

facer sempre a túa vontade alí onde estea, e así ser instrumento da túa paz, do teu amor, do teu perdón.

SOMOS FAMILIA:



Somos da FAMILIA de Xesús.

A súa palabra crea FRATERNIDADE e vence o MAL.



XÉNESE 3, 9-15: *Poño hostilidade entre a túa descendencia e a descendencia da muller.*

Cando Adán comeu da árbore, o Señor Deus chamouno e díxolle: «Onde estás?». El contestou: «Oín o teu ruído no xardín, deume medo, porque estaba espido, e escondinme». O Señor Deus replicoulle: «Quen te informou de que estabas espido?, é que comiches da árbore do que che prohibir comer?». Adán respondeu: «A muller que me deches como compañeira ofreceume do froito e comín». O Señor Deus dixo á muller: «Que fixeches?». A muller respondeu: «A serpe seduciume e comín». O Señor Deus dixo á serpe: «Por facer iso, maldita ti entre todo o gando e todas as feras do campo; arrastraraste sobre o ventre e comerás po toda a túa vida; poñe hostilidade entre ti e a muller, entre a túa descendencia e a súa descendencia; esta esmagarache a cabeza cando ti a firas no talón».

Palabra do Señor.

SALMO 129: *R/. Do Señor vén a misericordia, a redención copiosa.*

II CORINTIOS 4, 13-5, 1: *Cremos e por iso falamos.*

MARCOS 3, 20-35: *Satanás está perdido.*

Narrador: Naquel tempo, Xesús chegou a casa cos seus discípulos e de novo xuntouse tanta xente que non os deixaban nin comer. Ao decatarse a súa familia, viñeron levalo, porque se dicía que estaba fóra de si. E os escribas que baixaran de Xerusalén dicían:

Escribas: -«*Ten dentro a Belzebú e expulsa aos demos co poder do xefe dos demos*».

Narrador: El invitounos a achegarse e faláballes en parábolas:

Xesús: -«*Como vai botar Satanás a Satanás? Un reino dividido internamente non pode subsistir; unha familia dividida non pode subsistir. Se Satanás se rebela contra si mesmo, para facerse a guerra, non pode subsistir, está perdido. Ninguén pode meterse na casa dun home forzado para arramplar co seu enxoval, se primeiro non o ata; entón poderá arramplar coa casa. Tede por seguro, todo se lles poderá perdoar aos homes: os pecados e calquera blasfemia que digan; pero o que blasfeme contra o Espírito Santo non terá perdón xamais, cargará co seu pecado para sempre*».

Narrador: Referíase aos que dicían que tiña dentro un espírito inmundo.

Chegan a súa nai e os seus irmáns e, desde fóra, mandárono chamar. A xente que tiña sentada ao redor díxolle:

Xente: -«*Mira, túa nai e teus irmáns e túas irmás están fóra e búscante*».

Narrador: El preguntoulles:

Xesús: -«*Quen son miña nai e meus irmáns?*».

Narrador: E mirando aos que estaban sentados ao redor, díxolle:

Xesús: -«*Estes son miña nai e meus irmáns. O que faga a vontade de Deus, ese é meu irmán e miña irmá e miña nai*».

Palabra do Señor. (Narrador-Escribas-Xesús-Xente)



Somos da FAMILIA de Xesús. A súa Palabra crea FRATERNIDADE e vence o MAL.

1. VER: Todos temos unha familia..

-Todos temos unha familia. Como é a nosa? Querémonos moito e axudámonos. Ás veces hai problemas: familiares que se morren ou familias separadas, familias que non se entenden, que rifan, que non se queren ou non se falan.

Como nos levamos na nosa familia?

2. XULGAR: Somos da familia de Xesús.

- No evanxeo de hoxe, Xesús ten problemas coa súa familia porque crían que estaba mal, que estaba fóra de si. Xesús aproveita isto para dicir algo moi importante: **«Estes son a miña nai e os meus irmáns. O que faga a vontade de Deus, o que escoite a Palabra de Deus e a cumpra, ese é meu irmán e miña irmá e miña nai».**

QUE NOS QUERE DICIR?

-Xesús quere que pertencamos á súa familia, á familia dos seus discípulos. Eu quero ser da súa familia, da familia da Igrexa.

-Que fai falta para ser da familia de Xesús?

- ***Escoitar a súa Palabra** que nos aluma, guíanos e fainos familia.
- ***Cumprila, facer a vontade de Deus**, o que nos pide nos evanxeos: iso é máis que cumprir unhas normas ou leis.
- ***Facer o que el quere para o noso ben e para o dos demais.**
- ***Seguir o seu estilo de vida sen escusas.**
- ***Vivir en comunión con el.**

-**Ser da súa familia**, cumprir a súa vontade, vivir a súa Palabra, **leva ás veces consigo incompreensión**, soidade, quedarse só, pero contamos coa forza de Xesús. Tamén el sentiuse incomprendido ata pola súa familia.

-Podemos dicir, pois, que a **Palabra de Deus crea fraternidade**: fainos discípulos pero tamén familia, fainos irmáns, rompe muros. E tamén **vence o mal**: axúdanos contra o mal e a violencia.

Valoras a Palabra? Sénteste familia de Xesús?

3. ACTUAR: Que a túa Palabra nos cambie o corazón.

-Digámoslle a Xesús: Graciñas Xesús pola túa Palabra que nos fai familia e nos ilumina para vencer o mal. Aquí estou, Señor, para facer a túa vontade, para ser instrumento da túa paz, do teu amor, da túa reconciliación.

Que estás disposto a facer?